

**Date – 06/05/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Larsap, General (Retd) Vijay Kumar Singh an vawiin khan langin Serchhip District a tlawh.
2. Mizoram sorkar leh sorkar laipui Ministry of Jal Shakti, Department of Drinking Water & Sanitation chuan Jal Jeevan Mission 2.0 kalpuina tura inremna MOU an ziak.
3. India leh Vietnam chuan vawiin khan thawhdunna tur inremna thuthlung chi hrang hrang an ziak
4. TVK hotupa Vijay-a chuan vawiin khan Tamil Nadu-ah sawrkar a siam theih thu Governor Rajendra Vishwanath Arlekar hnenah a thlen.



**GOVERNOR**

Larsap, General (Retd) Vijay Kumar Singh an vawiin khan langin Serchhip District a tlawh a. Larsap hian Sainik School Chhingchhip, 14 Assam Rifles Serchhip leh Shalom Special School, Serchhip te tlawhin zirlai, zirtirtu, ex-servicemen leh sipaite kawmin hun a hmang a ni.

Sainik School Chhingchhipah hian zirtirtu, staff leh zirlaite fuihna thu sawiin, Sainik School Chhingchhip atanga zir chhuak zirlai pahnih ten National Defence Academy (NDA) a lut thei tura exam an paltlang chu lawmawm a tih thu sawiin, an kalzelna turah duhsakna a hlan a. Sainik School chu mi tha leh danglam bik chher chhuahna tur hmun a nih thu sawiin, Armed Force-ah lut vek lo mahse, an kalna zawn theuhah chhawr tlak leh danglamna thlentu nih tum turin a fuih a. Ramin thalai nakin lawka hruaitu tha ni tur a mamawh tih sawiin, zirlaite chu danglam bik nih tum tur leh sang tak thlen tum turte, inthununna tha nei tur leh hlawhtlinna chang thei tura inpekna nunpui tlat turte, khawtlang leh ram tana chhawrnahawm tak nih tum turtein a chah a ni.

Vawiin vek khan Larsap chuan 14 Assam Rifles Headquarters, P&E Veng, Serchhip chu tlawhin, Commandant Col. Archit Goswami, SM chuan an hmalak dan a hrilhfiyah a. Ex-Servicemen member, Govt. Serchhip College zirlai leh sipaite a kawm a. Zirlaite chu ruihhlo leh a kaihnawih laka fihlim tum tur leh eng hna pawh thawk se, rinawm leh taima taka thawk turin a chah a ni.

Hemi hnu hian Shalom Special School, New Serchhip tlawhin board member leh zirlaite a kawm bakah ei leh in tur a ken sakte a hlan a. Shalom Special School tana a thawh hlawk em avangin Larsap hi chawimawina thuziak cheimawi an hlan nghal bawk.

Shalom Special School, Serchhip hi August ni 17, 2005 khan Chief Minister hlui Pu Lal Thanhawla'n a din a. Tuna an school building ni ta sakna tur lungphum hi Larsap hian Eastern Army Commander a nih lai, January 2010 khan a phum sak a, 4th Assam Rifles te'n Military Civic Action kaltlangin an sa a ni.

Tun dinhmunah Shalom Special School, Serchhip hian vohbik zirlai 36 a nei mek a ni.



## **BIS ISI MARK CERTIFICATION AWARENESS**

Food Civil Supplies & Consumer Affairs Department Secretary Pu Ravi Dadhich chuan Mizorama MSME Industry thang zelah Made in Mizoram uar a tul rualin, a tam zawng aia a that zawng ngaih pawimawh a tul tih a sawi.

Vawiin khan BIS Guwahati Branch leh Food, Civil Supplies & Consumer Affairs Department tangkawp chuan MINECO ah Mizoram chhunga industry neitu hrang hrangte leh Co-operative Societies engemawzat tan an hnathawhna leh than chhoh zelna tur atana pawimawh BIS ISI Mark Certification for manufacturers of various industries Awareness Programme an buatsaih a.

He hunah hian FCS&CA Department Secretary Pu Ravi Dadhich chuan thusawiin kalkhawm mipuite chu an hnathawhte hlawkthlak zawk leh changtlung zawka thawkchhuak tur chuan BIS Act 2016 hnuai a dan leh hrai an hriatchian a ngaih thu a sawi a. BIS leh ISI mark te chu bungrua a stamp nemkai emaw logo emaw ringawta ni lova, a hmangtute tan a him a , a tha tawh a nih tih nemnghehna a ni a ti a. Mizoramah pawh BUS licence nei thei 10 an awm tawh chu chhuanawm a tih thu a sawi a ni.

### **Byte: Ravi Dadhich**

Vawiin programme ah hian AMC huamchhunga sector hrang hranga Industry nei mi 60 vel an kalkhawm a, Technical Session hunah BIS Guwahati Scientist te atangin thupui 3 thlanbik – steel, furniture, AAC block leh PVC Pipe chungchang zirhona hun hman a ni a, kalkhawm mipuite atangin zawhna leh chhanna hun hman a ni bawk.



### **CM**

Samaritan Association for the Blind Special Blind School ten an school kum 25-na lawmna vawiina an buatsaih chu Chief Minister Pu Lalduhoma leh bialtu MLA, Minister Pu Vanlalhlana ten an hmanpui a,

Thusawiin Chief Minister chuan, taksa lama harsatna lian tak, chhuanlam remchang tak nei chung a zirna lama hlawhtlin tum naupangte an chhuanawm a ti a. Mit thalote tana skul siam chu sorkar pawhin a hlutzia a hriat avangin Adhoc Status a pe a. Zirtirtu a attach- a, chu bakah an sorkar chuan Middle Section bik chu Provincialize tura ngaihtuah tur zingah a dah a, PPP mode-a kalpui pawh a tha zawk thei, a ti.

Hostel Building pakhatat mipa leh hmeichhia an la awm khawm avangin Handholding atangin Girls Hostel sakna tur cheng nuai 50 an ruahman fel tawh a ti bawk.

Pu Vanlalhlana pawhin thusawiin, an tan tih theih a neih phawt chuan a theihtawp a chhuah zel dawn a ti a, tunah pawh MLA Fund atanga thawh theih project an neih chuan thawh a ni ang a ti,

Samaritan Association for the Blind hi kum 1990 a din a ni a, Special Blind School hi kum 2001 May thla atanga bul an tan a ni. A kum hmasa berah zirlai 16 an awm a, a hnuah chuan kumtin zirlai naupang 30 nei ziah ang an ni a. Kumin bikah hian 35 awmin Mizoram bakah Tripura, Manipur, Assam leh Myanmar atangin an kal a ni. School-ah hian Primary atanga High School thleng a awm a, HSLC hi kum 17 chhung zaa zain an pass tawh a. He school-a zirchhuak mi 22 in sorkar hna an thawk tawh a. Sorkarin Adhoc status a pe a, Mathematics zirtirtu a attached a, zirlaibu leh an mamawh dang a tum thin bawk.

<><><>

## **JJM 2.0 MOU**

Mizoram sorkar leh sorkar laipui Ministry of Jal Shakti, Department of Drinking Water & Sanitation chuan Jal Jeevan Mission 2.0 kalpuina tura inremna MOU an ziak a. Delhi atangin Union Minister of Jal Shakti Pu CR Paatil chuan online-in a telpui a. Chief Minister Pu Lalduhoma leh PHE Minister Prof. Lalnilawma te bakah PHE Official ten Aizawl atangin online-in an zawm bawk.

New Delhi-ah hian Secy Pi Zodingpui chuan Mizoram sorkar aiawhin MoU hi a ziak a. Department of Drinking Water & Sanitation, aiawhin Pi Swati Meena Naik, Joint Secretary chuan hming a ziak a ni.

Video kaltlanga thusawiin Chief Minister chuan, Mizoram chu India rama JJM zaa za tihlawhtling hmasa ber state zinga mi niin chhungkaw nuai 1 sing 3 & 3060 te chu tui herh haw theiin an siam a, Thingtlanga school leh Anganwadi Centre zawng zawngte Functional Tap Water Connection an pe vek bawk a ti.

JJM 2.0 chu nasa takin an tangkaipui dawn a, Viksit Bharat tihlawhtlinna pawimawh tak a ni dawn a ni, a ti bawk a. Chutihrualin, JJM kalpui tawhtea central share, December 2024 atanga la rawn release loh chu a rang lama release turin a ngen a ni.

<><><>

## **SPEAKER**

Speaker Pu Lalbiakzama'n ram leh hnam hmasawn tur chuan a chhunga chengte hriselna dinhmun a tha tur a ni a ti.

Vawiina Kulikawn, Aizawl-a Agilus Diagnostics laboratory thar a hawnaah he thu hi sawiin, Speaker Pu Lalbiakzama chuan mahni hriselna dinhmun hriat a, enkawlina tha dawn thuai chu sum tam tak sen ralna laka vengtu a ni a ti a. Mizorama diagnostic network awm te chu mipuiten an hriselna dinhmun an hriat zung zung theihna tura hman tangkai ni se a ti a ni.

<><><>

## HOME MINISTER

Home Minister Pu K.Sapdanga chuan Police tan Discipline chu duhthlanna a ni lo a, an inngahna lungphum a ni a ti.

Vawiina Mizoram Police ten PHQ Khatla GS Arya Mess-ah kumin 2026-2027 ‘Year of Discipline’ hawna inkhawm an neih a hmanpuinnaah he thu hi sawiin, Home Minister Pu K.Sapdanga chuan Mipui rorelna, Democracy laimu chu, mipui leh Sorkar inkara inrin ngamna a ni tih sawiin, mipui rinna chu amaha lo awm a ni lo a, nitin hlawhchhuah ngai a ni a ti a. Home Minister chuan Mizoram ralmuanna chu ngaia neih awl tak a nih avangin, Mizoram police te chu inthlahdah phah nan hmang lo turin a chah a, Police tan chuan inthlahdahna chu an hmelma lian ber a ni tih sawiin, Police tha tehna chu hmun ralmuanga an chet dan ni lovin, harsatna a lo thlen thulha a inralrinna danah a inngat tel a, Police tha chu hun ralmuangah inthununna tha nen a inbuatsaih reng a tul tih a sawi a ni.

Byte: Home Minister

Home Minister chuan Mizoram inchhuanna, State ralmuang nihna chu Police Standard tihniamtu ni loin, inbuatsaihna hun tha petu ni reng zawk rawh se a duh thu a sawi a, chhun leh zan emaw, hun pui lai a ni emaw, harsatna leh chhياتna a thlenna hmun thlengin, tihphung tha leh inpuahchahna tha nen Mizoram Police chu an inralring reng tur a ni a ti.

Kumina Mizoram Police thupui- in thununna, Discipline chu rawng an bawl sak mipuite hmuh theih turin Police te chezia, thusawi leh thutlukna siamah te a langchhuak tur a ni tih sawiin, Outpost kilkhawr ber atanga Aizawl khawpui lun lai ber thlengin Police te inthununna leh invawna chu a lang tur a ni a ti a. Year of Discipline chu mipuiin Mizoram Police chung a rinna an nghah ngam lehzualna tur rabhi pawimawh tak a ni a rin ngheh tlat thu sawiin, a hawng a ni.



## GARO HILLS INCIDENT INQUIRY

Garo Hills Autonomous District Council inthlan neih turah Garo Hills a tharum thawhna thleng chhuichiang turin Meghalaya Sorkar chuan Justice Retd T Vaiphei kaihruaiin Inquiry Commission a din a,

Kumin March ni 9 a West Garo Hills a thle thleng chungchang chhui tura tih an ni a, thla 6 chhunga report pe turin sorkar chuan a ti a ni.

March ni 9,2026 a Garo Hills Autonomous District Council inthlan nomination file laia buaina chhuak leh tharum thawhna thleng chhui turin Meghalaya Sqwrkar chuan Inquiry Commission a din.He Inquiry Commission hi Justice (Retd.) T.Vaiphei chuan a kaihruai dawn a.An thil chhuo report te hi thlaruk hnuah sawrkar ah ah thehluh leh dawn a ni.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



## INDIA & VIETNAM

India leh Vietnam chuan vawiin khan thawhdunna tur inremna thuthlung chi hrang hrang an ziaak a. An inremna zingah hian Digital Technology te, Rare Earth, Medical product Regulation, Public Sector Audit, Digital Payment System leh Culture leh Tourism lamte a tel. Vawiina Prime Minister Narendra Modia leh Vietnam President To Lam te New Delhi-a an inbiak hnuah heng inremnate hi ziah a ni a. Hruaitu pahnihte hian India leh Vietnam inlaichinna hrang hrangte an sawidun bakah khawvel thilthleng meka anmahni nghawngtu thil pawimawhte an sawi dun a ni.

Prime Minister Modia chuan thuchhuah siamin President To Lam a'n thlan tlin anih atanga thla khat chhung leka India alo tlawh chu India-Vietnam inkar a ngaih pawimawh zia tilangtu a ni a ti a. India leh Vietnam thawhdunna te tihnun zel an tum thu sawiin hemi atan hian India chuan Vietnam-a hmanlai hmunhlu My Son leh Nhan Tau temple te a tuaithar a ti a. India leh Vietnam inkarah hetiang hmunhlu pawimawh humhalh leh tihhmasawn zel hi a pawimawh hle a ni a ti bawk.



## TAMIL NADU

TVK hotupa Vijay-a chuan vawiin khan Tamil Nadu-ah sawrkar a siam theih thu Governor Rajendra Vishwanath Arlekar hnenah a thlen. Vijay-a Party Tamilaga Vettri Kazhagam (TVK) chuan Assembly inthlan neih zawh takah khan party mala seat la hmem ber niin seat 108 an la a. Sawrkarna siam turin seat 110 ngaiah seat 10 aia tlem lo a la mamawh a. Assembly thutkhawm hunah a sawrkar hi fiah a ni dawn a ni. Governor hnenah hian kar hnih chhung a sawrkar fiahna turin hun pek a dil bawk a ni.

Hetihlai hian AIADMK party chhunga MLA thenkhat chuan TVK hi thlawp an duh thu an sawi a. MLA panga nei Congress party chuan TVK an thlawp tur thu hi an puang chiang tawh a. MLA thlan tharte leh Tamil Nady incharge Girish Chodankar te thukhawm chuan TVK sawrkar thlawp an rel a. Congress MP Karti Chidambaram chaun TVK an thlawp tur thu hi a puang a.

Hetihlai vek hian hun rei tak Congress lo thawhpui tawh DMK chuan COngress in TVK an thlawp anih chuan an thawhdunnaah nghawng na tak a nei dawn tih an puang thung a ni.

